

**Akilaraaruserinermik ingerlatsineq pillugu Inatsisartut inatsisaata
allanngortinneqarnera pillugu Inatsisartut inatsisissaattut siunnersuut**
Aningaasaqarnermut Akileraartarnermullu Naalakkersuisumit saqqummiunneqartoq

pillugu

Aningaasaqarnermut Akileraartarnermullu Ataatsimiititaliap

siunnersuutip aappassaaneerreqarneranut

ISUMALIUTISSIISUTAA

Aningaasaqarnermut Akileraartarnermullu Ataatsimiititaliap suliarinninnermini kingullermik ilaasortarai:

Inatsisartunut ilaasortaq Erik Jensen, Siumut, siulittaasoq
Inatsisartunut ilaasortaq Pele Broberg, Naleraq, siulittaasup tullia
Inatsisartunut ilaasortaq Jørgen Rosbach, Demokraatit
Inatsisartunut ilaasortaq Margrethe Thaarup Andersen, Demokraatit
Inatsisartunut ilaasortaq Mariane Paviassen, Inuit Ataqatigiit

UKA 2025-mi ulloq 26. september siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Inatsisissatut siunnersuut aningaasaqarnermi ingerlatsiviit aamma akunnermiliuttut akileraartartullu suliamut attuumassuteqartut nalunaaruteqartussaataitanerat pillugu malittarisassanik aalajangersaanissaq nutarterinissarlunniit siunnertaralugit Naalakkersuisunut piginnaatitsissutinik marlunnik imaqarpoq.

Allannguutit immikkut nassataraat aningaasaqarnermi ingerlatsiviit sullitaminnit nammineq pilluni nalunaarutinik atuuttunik pissarsiniarsimanerminnik aammalu kontomik Akileraartarnermut Aqutsisoqarfimmut nalunaarutiginnikkunik kontop suuneranik paasissutissiissussaananerat. Akunnermiliuttut akileraartartullu suliamut attuumassuteqartut allat nalunaaruteqartussaataitanerannik erseqqissaaneq ilanngunneqassasoq aamma siunnersuutigineqarpoq, tamatumalu kingunerisaanik nalunaaruteqartussaataitaasut sullitamik

nalunaarutigineqartussat akileraarutinik nalunaarsuiffimmi normuinik katersuisussaataassallutik.

Paasissutissat taakku paasissutissat ullumikkut nalunaarutigineqartut peqatigalugit nunani allani akileraartarnermut oqartussanut paarlaasseqatigiissutigineqartassapput. Paarlattuanillu Akileraartarnermut Aqutsisoqarfik nunanit allanit paasissutissanik assingusunik pissarsisassaaq, tamannalu akileraartarnermik nakkutilliinermut nukittorsaataassaaq.

Naggasiullugu § 68 a naleqqussarneqarpoq, taamaalilluni aalajangersakkap kalaallisuaa danskisuaalu naapertuutilerlutik.

Siunnersuutip Inatsisartunit siullermeerneqarnera

Siunnersuut siullermeerinninnermi partiinit tamanit tapersersorneqarpoq inatsisissatullu siunnersuut aappassaaneerneqarnissani sioqqullugu Aningaasaqarnermut Akileraartarnermullu Ataatsimiititaliamit suliarineqartussanngorlugu innersuunneqarpoq.

Tusarniaanermut akissutit

Siunnersuut piffissami 6. juni 2025-mit 4. juli 2025-mut tamanut tusarniaassutigineqarsimasoq siunnersuuteqartumit paasissutissiissutigineqarpoq. Bankivik aamma Sulisitsisut oqaaseqaatitalinnik tusarniaanermut akissuteqarsimasut paasissutissiissutigineqarpoq. Oqaaseqaatit siunnersuummi allannguissamut tunngavissiisimanngitsut siunnersuuteqartumit paasissutissiissutigineqarpoq.

Siunnersuutip aningaasaqarnikkut kingunerisassai

Siunnersuutip piviusunngortinneqarnerani aningaatigut kingunerisassat siunnersuummut nalinginnaasumik nassuiaatini allaaserineqarput. Siunnersuut pisortanut aningaasaqarnikkut allaffissornikkulluunniit kinguneqartussatut naatsorsuutigineqanngitsoq allassimavoq. Nunatsinni aningaasaqarnermi ingerlatsiviit aningaasartuutigisinnaasaat killeqartussatut aammalu aaqqiissummik immikkut nalimmassakkamik ineriartortitsinermi ingerlatsinermillu aningaasartuutinit annikinnerujussuussasutut tagginneqarput. Siunnersuut akunnermiliuttut akileraartartullu attuumassuteqartut annertunerusumik aningaasartuuteqarnerannik nassataqartussatut naatsorsuutigineqanngilaq. Tamatumunnga ataatsimiititaliaq allanik oqaaseqaatissaqanngilaq.

Ataatsimiititaliap siunnersuummut oqaaseqaatai

Siunnersuut siullermeerneqarami nalinginnaasumik taperserneqartoq ataatsimiititaliamit maluginiarneqarpoq. Nalunaaruteqartussaataitanerup siunnersuutigineqartutut annertusineratigut akileraartarnermik nakkutilliinerup nukittorsaavigineqarneranut aammalu naleqquttumik ersarissumillu akileraarusiinermut inatsisip peqataaqataanera ataatsimiititaliamit pingaartinneqarpoq.

Siunnersuut una nunatta nunani tamalaani isigineqarneranut pingaarutilittut Naalakkersuisunit oqaatigineqartoq ataatsimiititaliamit maluginiarneqarpoq, taamatullu nunani allani akileraartarnikkut oqartussaasunut paasissutissanik paarlaasseqatigiinnikkut nunat tamalaat akileraartarnikkut suleqatigiinnerannut peqataaneq ataatsimiititaliamit pingaartinneqarpoq.

Inatsisip kalaallisuuata danskisuuatalu imminnut naapertuunnissaat qulakkeerniarlugu siunnersuut manna aqputigalugu oqaatsinik naleqqussaanissap pisariaqarnera siunnersuutip siullermeerneqarnerani ajuusaarutigineqartoq ataatsimiititaliamit maluginiarneqarpoq. Siunnersuutini kukkunerit assigiinngissutaasullu akuersissutiginninnissaq sioqqullugu siunissami iluarsineqartarnissaasa Naalakkersuisunit qulakkeerneqartassasoq ataatsimiititaliamit kaammattuutigineqarpoq, taamaaliornikkut sorliup atuuttuuneranik nalornissuteqalersinnaaneq pinngitsoortinniarlugu.

Ataatsimiititaliap inassuteqaatai

Siunnersuut **akuerineqassasoq** ataatsimiititaliap **isumaqatigiittup** inassutigaa.

Taamatut oqaaseqaateqarluni isumaliutissiissummilu allassimasutut paasinnilluni
ataatsimiititaliap siunnersuut aappassaaniigassanngortippaa.

Erik Jensen
Siulittaasoq

Pele Broberg
Siulittaasup tullia

Jørgen Rosbach

Margrethe Thaarup
Andersen

Mariane Paviasen Jensen